

Cungkil bakat baharu atlet

BANTING - Kejohanan Bolasepak 9 Sebelah Tertutup, Piala Dato' Dr Ahmad Yunus Hairi, akan diadakan pada 28 dan 29 Mei ini di Stadium Jugra dan Padang Awam Kampung Sungai Buaya, di sini.

Setiausaha kejohanan, Izuddin Ibrahim berkata, ia anjuran bersama Pusat Khidmat Masyarakat Dun Sijangkang, Persatuan Bolasepak Melayu Selangor (PBMS) dan Majlis Daerah Kuala Langat (MDKL).

Menurutnya, PBMS akan menjadikan kejohanan itu platform mencungkil bakat baharu dalam kalangan remaja dan pemuda di sekitar Kuala Langat, bagi mencari pemain yang berpotensi un-

tuk menghadapi Kejohanan Bolasepak Piala Emas Raja-Raja 2016.

"Sebanyak 32 pasukan dijangka bermain secara liga sebelum ke peringkat kalah mati dan perlawanan akhir.

"Juara akan menerima piala pusingan, wang tunai dan medal. Manakala, tempat kedua, ketiga dan keempat akan menerima wang tunai dan medal," katanya.

Izuddin berkata, maklumat lanjut borang dan syarat penyertaan boleh didapati dengan menghubungi Shahimy (013-2342323), Nizam (012-6397015) dan Sharudin (013-6431137) atau di laman sesawang pbms.com.my.

Selain itu, borang penyertaan juga boleh diperoleh

di kaunter pertanyaan dan laman web www.mdcl.gov.my. dan tarikh tutup penyertaan ialah pada 21 Mei.

"Sempena kejohanan ini, akan diadakan satu perlawanan persahabatan amal antara pasukan bekas pemain Selangor dan Pahang pada Sabtu, 28 Mei jam 8.30 malam di Stadium Jugra.

"Ia bagi mengutip sumbangan untuk bekas pemain Selangor dan Malaysia, Zapril Hashim dan Azhar Shariff yang mengidap penyakit kronik," katanya.

Pasukan Selangor yang dipimpin Zulkifli Norbit, bakal menyaksikan kemunculan K Gunalan, Malek Rahman, Karim Pin dan Talib Sulaiman.

Rayu premis niaga dibuka semula

Pengusaha bengkel jahitan sudah bayar tunggakan sewa tetapi kedai masih dikunci

SIJANGKANG - Seorang pengusaha bengkel jahitan kesal apabila rayuan permohonannya menyewa semula premis perniagaan milik pihak berkuasa tempatan (PBT) ditolak meskipun sudah menyelesaikan tunggakan sewa.

Aslinda Ali Akhbar, 48, berkata, dia mengakui gagal membayar tunggakan sebelum ini namun selepas premisnya dikunci dia berusaha mencari wang untuk menjelaskan tunggakan lebih RM1,500 itu dengan kadar segera.

Menurutnya, dia mengusahakan bengkel jahitan itu sejak 18 tahun lalu, tetapi gagal menyelesaikan tunggakan gara-gara berdepan pelbagai masalah keluarga sehinggakan premisnya dikunci.

"Lebih memeranjatkan bila akak dapat tahu ada pihak bakal ambil alih premis akak ni sedangkan akak tak diberi apa-apa surat untuk ditandatangani sebagai bukti akak serah premis ni.



Barangan perniagaan Aslinda yang terpaksa dikemaskan.

"Tu yang akak kesal, sebab akak ada ambil upah jahit baju raya, macam mana akak nak jahit baju pelanggan kalau tempat tak ada," katanya sedih.

Jelasnya, dia turut kerugian RM20,000 apabila segala produk barangan jahitan dan produk kecantikan yang ditempah dan sebahagiannya telah sampai tetapi tidak boleh

menjalankan perniagaan di situ.

Katanya, dia sangat mengharapkan budi bicara daripada pihak bertanggungjawab dalam membantu usahawan Melayu seperti ini.

"Akak sebenarnya dah rancang macam-macam untuk persiapan raya ni dan dah terima pelbagai tempahan pelanggan.



Aslinda (kanan) ketika menjalankan kelas jahitannya.

"Tapi bila jadi macam ni, akak tak tahu nak mengadu pada siapa. Tunggakan dah bayar tapi mereka masih kunci dan hanya buka bila akak nak ambil barang," katanya yang sempat menceritakan masalahnya kepada Adun Sijangkang, Datuk Dr Ahmad Yunus Hairi.

Dalam pada itu, Aslinda berkata,

dia masih hendak berusaha mencari jalan mempertahankan premisnya itu kerana meminati perniagaan jahitan.

Sementara itu, *Sinar Harian* ketika menghubungi Majlis Daerah Kuala Langat (MDKL) dimaklumkan, pihak berkenaan akan memberikan maklum balas dalam masa terdekat.

Yakini sekolah mampu didik anak

PULAU CAREY - Ibu bapa perlu memberi keyakinan dan sokongan penuh kepada sekolah untuk mendidik anak masing-masing mencapai kejayaan.

Ketua Cabang PKR Kuala Langat, N Radha Krishnan berkata, kepercayaan yang diberi akan memudahkan pelbagai bentuk kerjasama antara dua pihak dalam memastikan kecemerlangan.

"Saya mahu lihat anak-anak di Pulau Carey tanpa mengira bangsa dan agama mendapat pendidikan yang sempurna.

"Kebanyakannya anak pekerja ladang, jadi mereka ini perlukan perhatian antaranya dengan memberikan sokongan dan kepercayaan kepada sekolah untuk mendidik.

"Kalau kita tak percaya dengan kemampuan sekolah, macam mana anak-

anak ni nak berjaya," katanya selepas merasmikan sukan tahunan yang ke-42 Sekolah Jenis Kebangsaan Tamil (SJKT) Pulau Carey Barat.

Beliau turut berhasrat menjadikan lawatan ke sekolah sebagai rutin berkalanya dalam memberikan galakan dan motivasi kepada anak-anak itu.

"Saya biasa datang ke program sukan bersama jawatankuasa dan ahli majlis untuk melihat sendiri suasana sekolah.

"Ternyata mereka memang berbakat dan boleh diketengahkan sekiranya diberikan perhatian dan bimbingan.

"Saya harap semua pihak saling bekerjasama membantu menerapkan budaya kesukan dalam diri anak-anak ini," katanya.



Radha Krishnan bersama ahli jawatankuasanya hadir pada program sukan di SJKT Pulau Carey Barat.

INFO

PANTAI KELANANG

- Pantai Kelanang adalah kawasan pantai berpasir dan ditumbuhi pokok-pokok rhu serta pokok kayu bakau.
- Pesisiran Pantai Baru Morib ke Pantai Kelanang dipenuhi oleh pokok kayu bakau sejauh 7 kilometer (km).
- Dari jalan utama, Jalan Morib akses ke Pantai Kelanang adalah melalui jalan kampung sedia ada di pekan Tongkah dan seterusnya dihubungkan oleh jalan berturap sejauh 5 km.
- Akses daripada Pekan Kelanang adalah sejauh 1.3 km. Akses daripada Jugra boleh melalui jalan sedia ada dari Jeti Kelanang dan seterusnya dihubungkan jalan yang berturap sejauh 3 km.
- Pelbagai kemudahan disediakan di sini seperti surau, tandas, gerai makan, kiosk dan pondok rehat.